

— Երկար խօսք չեմ ուզեր, գնա՞ իմացիր թե ինչ է առաջարկություննին:

— Երթամ... բայց...

— Գիտե՛ս ուրեմն եւ չես կրնար համարձակիլ գրուցելու, անհաւատի որդի:— Եւ թեւէն քաշելով,— շո՛ւտ, գրուցե՛ տեսնեմ,— ըսաւ:

— Չորս փոքրիկ աղջիկները, որք հայու գաւակ են՝ կ'ուզեն, որ իրենց յանձնուի, եւ երկու էլ մեծերը, որ դու միւսուլման ըրիր այս մօտերս...

— Ի՞նչ, աղջիկ տա՞մ իրենց, վեցն էլ հիմա ձեռոքս կը մորթեմ, գլխնին թող առնուն նստին,— ըսաւ կինը կատաղութեամբ եւ ոտք ելնելով:

— Բայց գիտես, Տիկին, թէ այդպիսի գործի մը հետեւանք ի՞նչ կը լինի:

— Ի՞նչ որ կուզէ թող լինի... բայց դու մատնիչ, դու իրենց ըսիր թէ այսպիսի աղախիներ ունիմ ես,— ըսաւ կատաղութեամբ յարձակելով երիտասարդին վրայ, որ յարգանօք եւ հանդարտութեամբ քայլ-քայլ ետ կը քաշուէր:

— Աստուա՛ծ վկայ, որ ես էլ չեմ գիտեր թէ ուսկից են իմացեր:

Այս միջոցիս ներս մտաւ պառաւ աղախին մը եւ դռան մէջ կեցած՝

— Տիկին, աստուած քեզ պահէ, այդ հայու աղջիկը, որ ամիսէ մը ի վեր բանտն էր, չի կայ, պատուհանին երկաթները կոտրտէր փախեր է:

— Ի՞նչ կ'ըսես. ողորմելի տկար աղջիկ մը երկաթները կոտրտե՞, անկարելի բան է. Ալի, շո՛ւտ պատասխան տուր, այդ աղջիկը ո՞վ փախցուց, եթէ ոչ՝ հիմա...

Եւ դաշոյնը մերկացած՝ երիտասարդին վրայ յարձակեցաւ, որ թեւէն բռնելով միշտ հանդարտութեամբ